

## S C H O L I O N

Novatores , qui e duobus tria vident , & in meridiana luce cœciunt , contra Sacramentorum N. L. existentiam plura opponunt . Nulla debere esse in lege gratiæ Sacra menta , quippe quæ nihil aliud sunt , quam veritatis umbræ , & gratiæ ipsius figuræ ; præterea , admissis in Ecclesia Sacramentis , mutabilem Deum efficere , & Ecclesiæ ipsius unitatem nos scindere arbitrantur . Quidni erit mutabilis Deus , inquiunt , si alias ante Christi nativitatem , alia post Christi adventum hominibus Sacra menta dedit ? Quidni multiplex erit Ecclesia , quæ unitatem non habet Sacramentorum ? Sed vana hæc sunt , & ejus naturæ argumenta , ut non Fidem infirmit , sed indoctorum hominum inscitiam prodant .

Primo quidem argu mento refellendo meminisse sufficit quæ diximus C. II. Prop. I. §. VII. Sacra menta nimirum N. L. non esse infirma illa , & egena elementa , quæ olim habebat Synagoga , neque esse rerum futurarum signa , & umbras , ut erant Judæorum Sacra menta ; signa esse quidem , sed signa justificationis , sanctificationis , & gratiæ , quam Sacra menta ipsa passionis & meritorum J. C. virtute significant , efficiunt , & conferunt . Alterum argumentum ne hilum quidem valere , inde constat , quod Divinæ immutabilitati , non operum , sed consiliorum æternorum mutatione obstat . Quæ igitur fuerunt ab æternitate præordi nata & prævisa , successive in tempore fiunt , quin aliqua mutatio , vel ex parte rationis æternæ , vel ex parte immutabilis Divinæ voluntatis fiat ; Deus enim ut loquitur S. Augustinus ep. V. significaciones ad doctrinam saluberrimam Religionis pertinentes , per mutabilia tempora , sine ulla sui mutatione disposuit . Tertium argumentum Androclide vitio laborare jam demonstravit V. C. Gaspar Suenius in Comm. Historico-Dogmatico de Sacra mentis diff. I. q. 1. c. 4. , Ad Ecclesiæ veteris cum nova identitatem , inquit , unitas Sacramentorum , secundum id , quod significant , sufficit , nec eadem unitas secundum signa extrinseca requiritur , licet ad unitatem Ecclesiæ , secundum præ-

„ sen-